

शुख

शेख-उल-आलम (नुन्द ऋषि)

★ ★

*Compiled and re-written in
Standardised Devanagari-Kashmiri by M.K.Raina.*

Source:

Kuliyate Sheikhu-ul-Alam, compiled by Moti Lal Saqi, a Publications of
J&K Academy of Art, Culture and Languages.

Work completed on 08.01.2005

★ ★



★ ★ ★

Nund Reshi' s Shrukhs

Compiled and re-written in Standardised Devanagari-Kashmiri by M.K. Raina, Mumbai



M.K.Raina

१

अख नय मरि अख नय ज़ेये
तंग गछि आलम वन्नि मो रेये।
अख नय गछि तु अख नय यिये
चरख गछि बंद तु कुस क्या खेये ॥

★ ★ ★

२

अथु ज़ु टुविथ ख्वर ज़ु वहॉरिथ
निनम दुनियिहुच लोलॅर त्रॉविथ कथ।
गरय निनम गीहबार त्रॉविथ
यिनम अंद मज़ार साँविथ कथ ॥
नुंघन हूर थवन वलुलॉविथ
डुठ्यन दोज़खुन नार ताँविथ कथ ॥ ॥

★ ★ ★

३

अथु खोर छजाम, अथि कूँछ लोगुम
छ्वनि कथु करान गोस शर्मसार।
न काँसि दिचाम, न काँसि ज़ोगुम
समसार ज़ोनुम मे शून्यकार ॥

★ ★ ★

४

अंदर नय अँच्य़ि तवय मारन
कामगारन दीदार दिये।
आशक डीँठिम योरय लारन
माशोक दपान यार कर यिये ॥

★ ★ ★

५

अँदरु यस खबर वॉचुय रुहस
तस दोज़खु तलु काँसुख थरुय।

येम्य डंडु कुंडु बॅछी नैदरि तु मुहस
सुय बंद चाव सुहस हॅरुय ।।

★ ★ ★

६

अनहारस नैदुर पेयम यामथ दूह गोम
कारस दूह ग्रंज चाम नु अख ।
आदनुक क्रय तु कारन वेह गोम
तथ पंथानस हेचुम नु सख ।।
तेलि प्योस फिकरि येलि व्वथुन कोह गोम
ताम आम यार तु रूज नु हख ।
च्यूनूम न जि याम मंद्युन दूह गोम
च्यूनूम नु केंच तु लॅजुम हख ।।
यावुन म्योन, सु ति कोर सनु गोम
?????? ।।

वनुन व्योपुम नु पनुन राह गोम
सियाह गोम कलम लीखिथ कथ ।
जानु कस वॅनिथ यिरुवुन तोह गोम
दुनियुहुक मुह गोम चॅलिथ कथ ।।

★ ★ ★

७

अवल अॅलिफ कुनुय अल्लाह
अवल पतु आँखुर जु वालन तस ।
बे गौव मुहम्मद रसूल अल्लाह
कयामुच्च शफात करि उम्मतस ।।

★ ★ ★

८

अवल रॉचुय ख्यावी चावी
माँजि रॉचुय प्रावी स्वख ।
शिवु रॉचुय दोप दोप क्रावी
आँखुर रॉचुय ब्रावी दूख ।।

★ ★ ★

९

अवलि सवलि यडा बरे
अँक्यसुय पोस्तस अंदर वुमर बरे ।
द्यन दूह सुर लादि प्यठ गुजरे
तौत कोत नुंद संजमान करे ॥

★ ★ ★

१०

अल्लाह परनस दौरा फिर्यजे
जगतुच लादन सँर्यजि नु ज़ांह ।
यादस तिहिंदिस दूह द्यन बँर्यजे
जिंदय आँसिथ मँर्यजि नु ज़ांह ॥

★ ★ ★

११

अव्वल सुय आँखुर सुय
नदुबल वँसिथ मल काँसिव ।
दस गुल्य् गँडिथ तस कुन आँसिव
द्यव कुनि दोज़खुनि नारु लँसिव ॥

★ ★ ★

१२

अँग्न गगन ब्रमावी
जुय दूदुचि दारु आसन ।
जुय आँलिम बसावी
जुय नबस तारु आसन ॥

★ ★ ★

१३

अँछन वुनज़ कनन ज़र गोम
ज़बॉन्य वर गोम दपस क्यॉत्त्य ।
दारु सरायि दूदुर कर गोम
हायुक दर गोम लदस क्यॉत्त्य ॥

दँह्यलिस पानस चमरुव पर गोम
लायल हर गोम पकस सॉत्त्य् ।।।

★ ★ ★

१४

अँलिम छुय सौँदूकस स्वन ज़न बरुन
सिवस सोदा पकुन पवु
सोदामुन्न छुय पोज़ अज़मावुन
ईमान च़ोंग छुय रछुन वावु
नमाज़ छय ज़मीनि फल ज़न ववुन
अदब छुय नुंद पपी तवु
दिल छुय गाड ? मो त्रावुन
ज़िकरि हुंद पोन्त्य् दिस लसी तवु
नफ्स छुय लाल अथु मो त्रावुन
साह्यब छु माशोक तोशी तवु

★ ★ ★

१५

अँलिम पँरिथ ज़ोनुख अँस्य् गँय वेठ्य
तिम वेठ्य ग्वगल टेठ्य गँय ।
यिम मातम ह्यथ अंदवन बीठी
तिम तल ऑसिथ पेठ्य गँय ।।

★ ★ ★

१६

अँलिमुक असगुर वँलिमुक माने
क्रयि हुंद आगुर मेनीखन ।
शुन्यहुक आगुर पानय ज़ाने
सौदरुक आगुर लबस नु छ्यन ।।

★ ★ ★

१७

अँलिमुक बोर लोदहख खरन
करन ग्वनाह बंदगी साहिबस्युय ।

हस्दु नफाकु प्रकथ बरन
तिम हवालु कॅरिख शेतानसुय ।।

★ ★ ★

१८

अंदु कम वुछन बंदु कम आसन
कयामुच्च अहवाल हय क्या आसे ।
तारु कम तरन नारु कम लसन
रहमतु बॅर्यत्यन ह्यमथा आसे ।।
दोज़खुन बयि छु आमन तु खासन
कयामुच्च तामथ सुय हो आसे ।।।

★ ★ ★

१९

अंदवन नीरिथ तप चरहाव
ओहर करहाव व्वपल हाकस तु हंदे ।
आमच्चे च़ख योद पथ करहाव
ती योद करहाव मरहाव कंदे ।।

★ ★ ★

२०

अंदवन नीरिथ तफ च़रुहा
ओहर करु हा हाकस तु हंदे ।
आमुच्च च़ख युद पथु करुहा
ती योद करु मरुहा कंदे ।।

★ ★ ★

२१

अँदरु कूद त्रावख नतु
नेबरु कूल कंदे ।
अंतु मल कासख नतु
छोन्य व्वथु बेठ कंदे ।।

★ ★ ★

२२

अँललड डरन तु डँरलथ नु डललन
डुनख डँह्य लललन गलश कतल आसे ।
डुठल तु डदु अनुतु डरन
डरन अडल सुतुडु रकवल आसे ॥
हकल डंदोरल गछल सुतुडु वलन
सुवंदरन सुतुडु डुडुथ तलडन आसे ॥॥

★ ★ ★

२३

आगुरु आसलहेस सलस लंजल डरनस
अदु छडु कलडल कलडल तरनस शडु ॥

★ ★ ★

२ॡ

आदनु खडुडलस कूरलस तु वीरस
डँरलथ डीरलस कुरेवुडड डंगु ।
डथ कडल करव लूडनलस डीरस
डेतल नु डुडलडलथ रोज़लन कुरंगु ॥
तलथु कुरुव रछलडख डलथु तुडूर रँछुडकुरल नुीरलस
डतव डुकुरनड नलरुवल कंगु ॥॥

★ ★ ★

२ॣ

आदनु तुडूलुस दरन तु दरन
वुडुडूर रँवुडड खलरन सुतुडु ।
वुद कडथु नु रोज़लस डुवनुवनुडु डुडलरन
दुव लुडखुहनड सलतलरन सुतुडु ॥
डुलु सललँडु तलरु तलरन
वुडुडेद छडु डुवन डलरन सुतुडु ।
रुतुडुन रुतुडुन डुडुन डुडुन डुडुलरन
कवु कुरलनु लगु डल गुवनलहगलरन सुतुडु ॥

★ ★ ★

२॥

आदनु खूचुख वज़ूहस तु स्नानस
याम नादानस दॉर गॅयी छँचुय ।
सँन्य् च्यथ द्युतुथ दँसिलस तु छानस
छुख लदान आसमानस म्यँचुय ॥
डाय गज़ जॅमीन लानि छय पानस
लज़लो यि लॅर लॅजुथ कथ किचुय ॥ ॥

★ ★ ★

२७

आदनु यि करख ति अदु नु तगी
आदनु करख तु लगी सुती ।
यिम फॅल्य् ववख छँत्य् क्या ज़गी
तिम तति ऑखुर तस लोनख कुती ॥
गिहु बल त्रॉविथ दिहु बल लगी
अदु नुन्द तु डूठ लगी पानस सुती ॥ ॥

★ ★ ★

२८

आयास योत तु गछव कोतू
ज़ोनुम नु मंज़ु मा दुवोत ब्वे ।
तस क्या करव अँस्य् ललु पोतू
यस अथि सोन ल्यखुत ब्वे ॥

★ ★ ★

२९

आयि ति बवनय, गछव ति बवनय
बवनस ख्वतु नु बवनय खास ।
योद वनि आसन व्यंदख कवु नय
ख्यनु खोतु छुय आपुरनुय खास ॥ ॥

★ ★ ★

३०

ऑर्यफन तु आशकन शूबा लॉजिन
अँदरुच आवाज़ न्यबर कवु गॅय ।

शरहुकिस सोथिस सीरा वॉजिन
अदु कॉठिस खोरुख खबर गॅय ।।

★ ★ ★

३१

आशक तिम यिम पाक रछन बदन
लाशख हूर वातनख खँजमँच्युय ।
आह तु व्वशि लेदुर्यख बदन
द्यव कुनि म्वखु डेशन सूरच्युय ।।
बिहिश्तस ब्रोंठ तिमय पान लदन
यिम येति लोलु तिहँदि वदन यँच्युय ।।।

★ ★ ★

३२

अँशदर वुसनम कुनिस जानस
मॉदु करन वुसखानस मे ।
हिसाब ह्यनम दानस दानस
क्या तति पाय हॉरानस मे ।।
अँशदर वसनम कुनिस जानस
मॉदु करन वुसखानस मे ।।।

★ ★ ★

३३

आसु तु दिवुर छुय जोरमुतुय
रुशि तु ब्वगज़ु छुय बोरमुत पान ।
दुहुल्यु बतु छुय होरमुतुय
कवु ज़ानु अथु कति लगी ईमान ।।

★ ★ ★

३४

आदन सोंथ छुय नेर शिकारस
वँहरस क्युत बायि आसी रुतुय ।
दूर रोज़ पनुनिस दर रोज़गारस
ऑखुरतस क्युत आसी रुतुय ।।

★ ★ ★

३५

आरुबलन नागु रादा रूदुख
साँदा रूदुख चूरन मंज ।
मुडु गरन ग्वर पँडिथा रूदुख
राजु होंजा रूदुख कावन मंज ।।

★ ★ ★

३६

आदम व्वपदोवुन स्वबाव मेचे
मेचि हंघ कर गँडिथ कथ ।
सारि न्यामच व्वपदाव्यन मेचे
रनान मेचिव्यन बानन क्यथ ।।
जुव चलि नीरिथ मोर म्वचि मेचे
मेचे मेच गछि मीलिथ कथ ।।।

★ ★ ★

३७

आदनु वँरिथ पापन कशी
बुडिथ द्युतुथ रीशी नाव ।
तस्बीह गँयी गुनस हिशी
यि चॉन्य नमाज कशी हाव ।।

★ ★ ★

३८

आयास वते गँयास वते
स्यमंज स्वथे लँजिम राथ ।
वुछुम चंदस हार नु अथे
नावि तारस दिमस क्यात ।।

★ ★ ★

३९

आशकन त्रेश तु ब्वछि नु आसे
आशक कमस पथ यिनय नु ज़ात ।

छु दुरस वतन सदफस निशे
चूरस नैदरि आसि नु ज़ात ।।

★ ★ ★

४०

आस ति स्योदुय, गछु ति स्योदुय
सेदिस होल मे कर्यम क्यात ।
बु तस गँयास तती व्योदुय
वुदिस तु विदस कर्यम क्यात ।।

★ ★ ★

४१

ओरतुय बुकुर करान कृहनू
ओरतुय बिहान बरतल ।
ओरतुय व्वपर गछान पनुनू
ओरतुय स्वनस करान सरतल ।।

★ ★ ★

४२

कँशीरि पयूरुस अँदी अँदी
काँसि नु वुचरम बर आँदी त्राव ।
जंदस येलि कँरुम पैवँदी
अदु दोपुहम फंदुय हाव ।।
छन्यर प्यवान बँड शरमँदी
नन्यर गछान अँदी हाव ।
यामथन वातान बार तहँदी
तामथन गछान बर आँदी वाव ।।

★ ★ ★

४३

क्वंग छुय गासु ज़मीन सोना
स्वर्ग हय गछी तु क्रय कर ।
स्वर्गस बर प्यठ दरख्त तूबा
सु हबा स्वरगुक गाशर ।।

★ ★ ★

४४

क्या करि अँन्य सतु गज़ि पूछे
क्या करि नस्ति रछे र्वंग ।
क्या करि गॉन्य तस्बीहि रुछे
क्या करि थविमुछे प्रंग ॥

★ ★ ★

४५

क्या करु पांचन शन मंज काहन
सु पानु काहन दिथुय द्राव ।
योदवय अके वते पकहन
अदु कति राविहे काहन गाव ॥

★ ★ ★

४६

करतो क्रय तु बेहतो पैजे
मुरखो बोज़तो रंजिविथ ।
आशको पुल तु पॉतव गंजे
यावुन मुडस च़ोल रिंजुविथ ॥

★ ★ ★

४७

कँह्य कँर्यज़ि र्वपस तु स्वनस
तवु ख्वतु अनाजकिस मनस पॉर्य ।
कँह्य कँर्यज़ि हरामकिस खज़ानस
तवु ख्वतु हलालुकिस दानस पॉर्य ॥
कँह्य कँर्यज़ि यारि रोस्तिस वनस
तवु ख्वतु दारि रोस्तिस पानस पॉर्य ॥ ॥

★ ★ ★

४८

क्रय युस करि सु हन मो थकी
शरह पकी पॉलिथ तु कथ ।

शूब तस आसि युस सहजय पकी
लूब तु तमाह गॉलिथ तु कथ ।।
युस कीजम ऑसिथ लीजम पकी
पनुन पान थवि वॉलिथ तु कथ ।।।

★ ★ ★

४९

कानन तहँघन दॉर्यज़ि नु सिपर
करतँज छ्वकन फिर्यज्यस नु र्वय ।
बलायि तहँजे वैद्यज्यख शकर
अदु छुय येति क्या तति ओबर्वय ।।

★ ★ ★

५०

काम कूद लूब मुह तु अहंकार छुय
दोज़खु नार छुय दिवान ब्राय ।
क्रय तु कारन उन्दु आदार छुय
चंदस द्वार छी मो कर ज़ाय ।।
हज़रते मुहम्मद हवादार छुय
यथ व्यचारस बिहि पानु खुदाय ।।।

★ ★ ★

५१

कामु तु कूदय लूब तु मूहय
पवनु सरहान ग्याना कथ ।
पापु सरस सॉर कोरुम रूहय
रौंगुम रोय तु च़ैंग्यम च़्यथ ।।

★ ★ ★

५२

कुसू गौव तु कॅम्यू ड्यूठो
कमू छी तथ ? ? प्यठ ।
युस यथ कामि च़ैलिथ ब्यूठो
तॅम्यु त्युथ लोबो ल्यँटुय वथ ।।

★ ★ ★

५३

कुरान परान कोनो मूदुख
कुरान परान गोय नो सूर ।
कुरान परान ज़िंदु क्यथु रूदुख
कुरान परान दोद मनसूर ॥
कुरान परान क्यथु बे गम रूदुख
यामथ फोरुय अकहोत चूर ।
यिमव पोर कुरान शब व रोज़ वोदुख
वदान सपनुख अँडिजन सूर ॥

★ ★ ★

५४

कूर छय मकृन्न दिन्य दिवदारस
चँटिथ करुस गनि लारी ।
गोबुर छुय तौज़्य बचि आँखरस
लँदिथ पलनु करुस सवॉरी ॥
बोय छुय अथु खोर बुजिरस
पेयस मुहिम कर्यस यॉरी ।
रँन्य छय रतन मनु टिपारस
नुन्दिस तु डठस करी यॉरी ॥

★ ★ ★

५५

केंचन द्युतुथ येति क्याव तोतुय
केंचन येति नतु तोतुय क्याह ।
केंचन द्युतुथ लालुक त्रोटुय
केंचन गाशि मंज़ु गोदुय गाह ॥

★ ★ ★

५६

केंचन छलु कथ कल ब्वद हँरिथ
केंच दार तु तोलु आयि वुनी ।

केंचन अमृतु प्रकथ बॅरिथ
केंचन वुम्बुर गॅयि दयिवनी ।।

★ ★ ★

५७

केंचन द्युतुख तोरय आलव
केंचव रचायि नालय वथ ।
केंचन मस चथ अँछ लजि तालव
केंचन न्यूलुय चॅल्य् हालव ख्यथ ।।
केंह गॅल्य् मूलु तु केंह गॅल्य् मालव
केंह गॅय वानन फालव दिथ ।।।

★ ★ ★

५८

केंचन साहेब्य् दिचाव क्रचर
लॉनिस लेख्यतिस क्या क्युथ करे ।
कुंह कोरुन छोन तु केंचन बॅरचर
आसि नय अँरचर कवु पुछि यिजे ।।

★ ★ ★

५९

केंचन कबर छय पोश ज़न शेरे
केंचन कबर छय सियाह चाह ।
केंह गॅल्य् साहिबु चाने वेरे
केंह गॅय ज़ेरे अकि गुमराह ।।

★ ★ ★

६०

केंच तु चॅल्य् ख्यथ ख्यवान बॅली
तिम स्वखु म्वखु व्वजॉली छी ।
शेतॉन्य तय कोरुख अकु खॅली
तिम सहज़ लबन नतु बॅली छी ।।

★ ★ ★

६१

केंच तु ज़लु मंजय दँदी
केंच तु फीरिथ आय अँगु स्वरूप ।
केंचव तु आरुबलु लाल लँबी
केंच तु छँरी आय संगल दुपु ॥

★ ★ ★

६२

केंचन ड्यकु छुय क्रय तु कामन
केंचन ड्यकु छुय यनामन कीतू ।
केंचन ड्यकु छुय हंद नतु सदामन
केंचन ड्यकु छुय पामन कीतू ॥

★ ★ ★

६३

केंचन कबर छय पोश ज़न शेरे
केंचन कबर छय सियाह चाह ।
केंह गँल्यु साह्यबु संजे वीरे
केंह गँय ज़ेरे अकि गुमराह ॥

★ ★ ★

६४

कंदो माज़ो लुकु हुंदिस कुसस
मुनाफिकस लदन बोरु ।
दोज़खुनि नारु लागस पाकस
अदु नापाकस फख यियि च्वपूरु ॥

★ ★ ★

६५

कंदो राथ खूचुख ज़लस
अज़लस क्यथ कँछ काय ।
यथ दुनियहस रखज़ालस
योत च़लस हो पँछ्य आय ॥
जँमीनस फल ब्वि कमस तु आलस
नतु कुत्यु आलुच्यु छँरी गाय ॥ ॥

★ ★ ★

६६

कंद्यो मरगि गुर्यन खसख
कंद्यो वसख नदि नावे ।
कॉल्य् संगरुक शीन ज़न च़सख
अदु मॉन्य् डजन लगख तच्चि तावे ।।
पव योद पकख तवु अदु लसख
नतु हबा कोरमुतुय रावे ।
बालु पानु लोसख बुजर डुसख
लोरि रोस अँनिस वथ कुस हावे ।।

★ ★ ★

६७

कम सना नैदरि हँती वुदी
कम सना नेशि ब्वदी ब्योन ।
कन सना लोलु अँशकुनि दँदी
कम सना सास तु कम सना स्वन ।।
कम सना मरनस ब्रोंटुय मूदी
ऑसी सास तु सपनी स्वन ।।।

★ ★ ★

६८

क्या करि दंदु रोस डूनिस
क्या करि रँनिस तीर कमान ।
क्या करि म्वख्तु हार हूनिस
क्या करि अँनिस पदमान ।।

★ ★ ★

६९

क्या वँर्यजि मरनस मँर्यनुन्यन वकानन
गौव कमन जानन छांगुर वँरिथ ।
पोन्य् ज़न च़ँमिथ गव नव्यन बानन
गँय वॉन्य् ज़न वानन फालव दिथ ।।

★ ★ ★

७०

काँम नय आसि तु कानथ कशी
लूब नतु आसि तु ज़ी कथ आये ।
दुय नय आसि तु सकली रेशी
स्वर नय आसि कुस कस दिये ॥

★ ★ ★

७१

क्वकुर बांग दियम पँतिमे प्यारे
चाकुर कँरुम नतु यूरुम क्याह ।
बुकरि सास प्यवान थज़कारे
वुकुर गछि तु दपस क्याह ॥

★ ★ ★

७२

क्वल मो लगी रंगन तु संगन
क्वल मो हंगन ल्यखनय आव ।
क्वल मो अशुद लगी अंगन
दरन अमल नतु क्वल कति आव ॥

★ ★ ★

७३

कसब यिम करन तु नमाज़ गुज़ारन
?? तिम यथ समसारस ज़ाय ।
छख लागनय बँदिथ पालनय करन
पँपिथ यियख बँड रहकाय ॥
तारु तरन तु नारु उबरन
तवुक फाँज़ दियख पानु खुदाय ॥॥

★ ★ ★

७४

कामु तु कूदय लूब तु मूहय
पवनु सरहान ग्याना कथ ।

पाप सरस सौर कोरुम रूहय
रौगुम र्वय तु च्यौगुम चथ ।।

★ ★ ★

७५

कौल्य बुधि वसनम नालु मोत ह्यनम
ग्रशन अमलु तु क्या चोन नाव ।
छटि तु गटे अँशदर वसनम
क्वसु म्यौन्य अमल तु क्या म्योन नाव ।।

★ ★ ★

७६

कौव्य खेयि गूज कान सतुतिस
न्यपथस मरुन कंदे ।
बराबर हुंद लोलौर प्यव क्वकर पूतिस
उतनि बलायि तुतिस वंदे ।।

★ ★ ★

७७

कुस नु गौडुम कुस नु छौडुम
चमरुवि हाँकलि गौडुम सुह ।
नफ्स तु शेतान छलु पौठ्य गौडुम
गौडुम वंदु तु वोलुम प्रीह ।।

★ ★ ★

७८

खानन हुंदान यिमन रोबु खानन
जानन दपान ज़ि ऊर्यहुंद गछ ।
स्वंदुर डीशुम हर्य वखनावान
चमरव सुत्य् डुवान लछ ।।
तति अज़ डीठुम कपसि खनान
नसर मे वुछ, च़ु वुछनि गछ ।।।

★ ★ ★

७९

खबर च्चे थँवनय नु रुहस
थ्वकु चानि अथ पॉर्य जॉनी ।
नावि थफ कर तो नोहस
नतु सोदरस थाह कति चॉनी ।।

★ ★ ★

८०

खलुर द्वदस साद क्या ज़ाने
बेद क्या ज़ाने नागुर्य पन ।
वांदुर चंद्रनस तर क्या ज़ाने
यम क्या ज़ाने शाम ख्वफतन ।

★ ★ ★

८१

खुदाय छु अकुय नाव छुस लछा
ज़िकरि रोस अख कछामो ।
वुम्बर व्यंदुन अकुय पछा
रिज़कु रोस अख मछामो ।।

★ ★ ★

८२

खसख वान तु ल्वय ज़न वज़ख
बूज़न दपी तु बोज़ख नाव ।
च्वपॉर्य फेर तु वावुरि क्वज़न
च्चे वॉम्य् कौरुय स्वज़न नाव ।।

★ ★ ★

८३

गँरीबस क्वलय छे कुडॉजी
तवय शांत्यव पॉजी मो ।
क्रोन्य् क्रोन्य् करान खेयिनस नॉजी
स्व प्वन्य् पापस बॉजी मो ।।
दब दब करान तु लॉजनस नॉजी
खँन्य् तलु तमि कॉर तॉजी मो ।।।

★ ★ ★

८४

गुरि रोस सिपाह छुय शुरि रोस मोलो
मालि रोस शुर छुय फलु रोस कान ।
पीरु रोस मुरीद तीरु रोस नोलो
खोरि रोस नॉविद तोरि रोस छान ॥

★ ★ ★

८५

गाँठ क्या ज्ञानि आयरि वसुन
माँथ क्या ज्ञानि मोदुर दाथ ।
शांत क्या ज्ञानि ललनय रसुन
हाँठ क्या ज्ञानि प्रसुन क्यात ॥

★ ★ ★

८६

ग्यान यस वोत रन तस तँजी
सु करि हरस त्रैति बाव ।
मद यस मूर तु खुदी त्रँजी
बु नु कुहनु तु मे क्या नाव ॥
सु येम्य् ड्यूठ दय तस त्रँजी
अदु कुस करि क्वंद तु ग्राव ॥ ॥

★ ★ ★

८७

गरुक अँगन ज़ोनुम नु अवलन
याम आवलनु ख्वर ज़ु वलनय आय ।
गरु दोपुय सरुहानु अवलन
गरु दपय नर कुत्य् वलनय आय ॥

★ ★ ★

८८

ग्रट्ट छु फेरान ज़ेरे ज़ेरे
ओहकुय ज़ानि ग्रट्टुक छल ।

ग्रटु येलि फेरि तय ज़ॉव्युल नेरे
गौ वाति पानय ग्रटु बल ॥

★ ★ ★

८९

ग्वफ बु वंदय हंदि लरे
जंदो बु वंदय पॉटी काय ।
गगरन तु राज़ु शोगन कंदे
वुम्बुर व्यंदे गरे डाय ॥

★ ★ ★

९०

ग्वर यस आसि सु नेरि कंदि नेरे
गछि बरुन्य तिहुंज हमेशु कल ।
ग्रटो फेरान ज़ेरे ज़ेरे
योद कूँछ ज़ानी ग्रटुक छल ॥
वारु येलि फेरि तु ज़ॉव्युल नेरे
अदु कुह वाती पाथि ग्रटु बल ॥ ॥

★ ★ ★

९१

ग्वरु कथ छय नाबद तु टंग
योद रोच्ची तु प्रयी ।
गॅछिथ गोर ग्वरस मंग
तवु व्वंदस शिहलथ पेयी ॥
तवय च़ली रोज़ुन बंग
खुदा ति अथि यियी ॥ ॥

★ ★ ★

९२

च़ु छुख बिहिथ प्यठ रोबुखानस
मेहमानस जाय कति दिख ।
छान येलि वसी च़ंदन तानस
तोरकस छानस वन क्या दिख ॥

★ ★ ★

९३

चंदुन चॅटिथ अरखोल सोगुम
शेतॉन्व जोगुम पतु शाहमार ।
अथु खवर छजाम अथि नो लोगुम
छ्वनि कथु करान गोस शर्मसार ।।
न काँसि दिचाम, न काँसि जोगुम
समसार ज़ोनुम मे शून्य कार ।।।

★ ★ ★

९४

चुय दिवु दरथस तु गरथस पज़ख
चुय दिवु क्रंजन हुंदुय छांफ ।
चुय दिवु ठैवु रोस्तुय वज़ख
कुस छुय पौन्व तु कुस छुय पाफ ।।

★ ★ ★

९५

चालुन छुय वुज़मलु तु त्रटय ।
चालुन छुय मंद्युन्यन गटुकार ।।
चालुन परबतस करनि अटय ।
चालुन छुय मंज अथस ह्योन नार ।।
चालुन छुय पान कडुन ग्रटय ।
चालुन छुय ख्योन वेह तु गार ।।

★ ★ ★

९६

चोक तु मोदुर ट्योठ तु ज़हर
खुनि जिगर येम्प ओहरु ख्यव ।
येम्प योत प्यठ ह्यँच च़ेड तु कहर
सु तथ शहर गॅछिथ प्यव ।।

★ ★ ★

९७

छि पॉज़न आपरान तु क्वकर तछान
छि मुडन फेरान बरतल त्रुकी ।
छि स्वज़न जखान, क्वज़न ख्यवान
छि जॉकिर हॉरान गॉफिल सोखी ॥

★ ★ ★

९८

छरा पेयायस कवु सनु चॉजिन
मनसूर काकस वुहुनॉजन गॅय ।
शांति हुंज़ क्रय क्यथ सोदु वॉजिन
अँदरिच ऑस तु न्यबर कथ पय ॥

★ ★ ★

९९

जॅरिस ज़र च़ाम हंगरे
बलि ना खंडु नाबदु शकरे ।
सुय रंगुर छारुन प्रथ गरे
युस कृहनिस थानस छोट करे ॥

★ ★ ★

१००

जाड्यन मंज़ लाल मो खोलन
ज़ालन मंज़ जानवार बोलन मो ।
सुरु लाद्यन यँबुरज़लु मो फवलन
काचु वानन म्वख्तुहार मेलन मो ॥

★ ★ ★

१०१

ज़ात छु दपान ज़ात छय म्यॉनी
तस अक्ल तु ब्वद दॉनी मो ।
उलग ज़ात नकस कुनी
पुलग ज़ात काँसि कुनी मो ॥
योद ब्वय आसी असलामुनी
तवु ख्वतु ज़ात कांछ प्रनी मो ॥ ॥

★ ★ ★

१०२

ज़ाथ ग्रशिथ क्या छुय सोदा
ज़ाथ ग्रशिथ क्या मुदा छुय।
ज़ाथ नो थँवनय कँबीलु जुदा
सारिनुय ब्रोंठ गदा छुय।।

★ ★ ★

१०३

ज़िकरि सुत्त्य् रटुन माले
फिकरि सुत्त्य् तारुस पन।
नफ्स गंड मालि हाले हाले
ज़न तोरुथ म्वख्तु माले पन।।

★ ★ ★

१०४

जुव तु मोर गछि पानस पानस
क्या लार्यव नादानस मे।
संज़ येलि करन कफनस तु स्त्रानस
दाह बाँच अंदु वुछन मेहमानस मे।।
त्राँविथ यिनम अंद मॉदानस
लुख गछन पानस पानस मे।।।

★ ★ ★

१०५

ज़्यथ क्या कँर नादौनी मे
अलय कुली रौनी मे।
ब्रनु कुल्य् छौनी मे
तिमन फल नतु क्या न्यू मे।।

★ ★ ★

१०६

जुव म्याने हा मनु शोठो
द्वहु द्वहु ग्वनाह छिय पोठाँनी।

ग्वनुहन कुनुय बोरथम टोठो
तति कुस यियी टोठॉनी ।।
नकीर तु मुनकर यिनय ब्रॉठो
ती करनय यि कस्ब करान कोठॉनी ।।।

★ ★ ★

१०७

ज्यवुवुन दोपुहम अलकास मलकास
खलकस छँडिथ अँनिहम दाय ।
नानि हुंज श्राख कोनु छुनिहम हलकस
पोछ ऑसिथ ति ज़ज हेन्य तु क्याय ।।

★ ★ ★

१०८

डख चलन मंदोरि च़सन
लूरिथ बॉलिथ आसन सॉरी ।
जुवस व्वन्य लग्यम क्या सन
मोलय मरि तु माजे पॉरी ।।

★ ★ ★

१०९

तील त्रॉविथ लॅश युस ज़ाले
तस कायस कज़ुल तु अथन फख ।
अख ख्वर व्वखुल्य् अख ख्वर नावे
पुशिस आस्यस च़कि वानि हख ।।

★ ★ ★

११०

तगियय तु बोछिस बूज़न दिजे
नॅनिस ग्रॅशज़ि नु क्या छय ज़ाथ ।
सवाब सासु गनु प्रॉव्यज़े
ति बाबु नुंद करि तु रावि नु ज़ात ।।

★ ★ ★

१११

तति क्या करव छटि तु गटे
येति लोलुनि वॉलिंग फटे हो।
खबरि रोस कबर पानु रटि नालु मते
मारन कूँछ तति रटे मो ॥

★ ★ ★

११२

तँरिथ आरु रशास प्रॉरिथ
बु गोस वादु दरगाहु कँरिथ कथ।
अँज बरि कौनिर कुन आस नीरिथ
बु व्वन्य ह्यकु नु फिरिथ कथ ॥

★ ★ ★

११३

तोबु योद करख, बवसरु तरख
तोबु छय वुन्यक्यन तारुवुन नाव।
तोबु रोस पानो तति कँह्य अबरख
येति छय तुर तु बुशुन वाव ॥

★ ★ ★

११४

तोश बन्दु नमाज़ि बेयि रमज़ानस।
ती बायि लगी पानस सुत्प ॥
कन थव श्रुक्यन हज़रते कुरानस।
ओत बायि वीर वाचौयि कुत्प ॥
द्वहु अकि लमु लम लगी यथ जानस।
अँद्य अँद्य यार बाँय रोज़नय कुत्प ॥
सँमिथ बाँय बाँय वालनय स्रानस।
लँम्य लँम्य बारव दिनय कुत्प ॥
कपुरा वलनय अँदरिस पानस।
नुंद तु डूठ लगी पानस सुत्प ॥
निथ अदु त्रावनय अंद माँदानस।
सँमिथ प्यठ म्यँच च्यलनय कुत्प ॥

डीशिथ कल कवु मँठुय नादानस ।
अथ शायि वीर गँयि चँमिथ कुत्प ॥

★ ★ ★

११५

तोशान तोशान व्वदुर बोरुम
ज़ज़ुर्य रखचस वोलुम पान ।
ज़ज़ुर बँरगस बँरगस फोरुम
वँरिम गवनाह तु मोरुम पान ॥

★ ★ ★

११६

तलु छुय ज्युस तय प्यठु छुख नचान
वन तु मालि मन क्यथु पचान छुय ।
सोरुय सोम्बरिथ येती छुय म्वचान
वन तु मालि अन्न क्यथ रोचान छुय ॥

★ ★ ★

११७

तलु छुय ज्युस तु प्यठु छुख नचान
वनतु मालि व्वंदु क्यथु पचान छुय ।
अज़ाब कबरस कोनु छुख खोचान
दपतु मालि अन किथु रोचान छुय ॥

★ ★ ★

११८

दमी डींठुम नद वुहवनी
दमी ड्चूठमस सुम नतु नार ।
दमी डींठुम थँर फवलुवनी
दमी ड्चूठमस गुल नतु खार ॥
दमी डींठुम सत ज़लुवनी
दमी ड्चूठमस दुह नतु नार ॥ ॥

★ ★ ★

११९

दमी हुय गोम दमी हुह गोम
दमी मुह गोम मुहिथ कथ ।
दमी अकुय कदम कूह गोम
दमी सुह गोम सोतिथ कथ ।

★ ★ ★

१२०

दॅमी गरि तु दॅमी दरे
दॅमी करय स्वखन अवलास ।
दॅमी पांचन पांडवन मॉज गरे
दॅमी लॉजिन क्रॉजी मास ।।

★ ★ ★

१२१

दॅमी डींठुम दज़ुवुन्यु गॅजी
दॅमी ड्युंठुम दुह नतु सास ।
दॅमी डींठुम पांडव मॉजी
दमी डींठुम क्रॉजी मास ।।

★ ★ ★

१२२

दरस लोदुख कोनु सनु मूदू
नारस लोयुख ति रूद मो ।
ऑर्यफव तु आशकव तवय वोदू
मनसूरय ओस मूद मो ।।

★ ★ ★

१२३

दॉनिश मंद छुय अमृतु गोरू
फ्यूर फ्यूर आस्यस पशपान ।
ब्रॉह कनि ह्यथ आसि किताबु लोरू
वुछिथ आसि टांजरान ।।
वुछुन ह्योत छु अँदरु छोरू
परस प्रुनिथ मशश पान ।।।

★ ★ ★

१२४

दौर चॉन्य कृहुन्य तु दार चोन नोवयो
येलि च्ने ओसुय यावन मथ ।
क्वंगम खाहस बंगु कॅम्प वॅवयो
वाटस तु ग्यवस मिलविथ रथ ॥
लूबु वुछनस कथ कॅम्प बॉवयो
रॉवयो मंज़ बाज़रस वथ ॥ ॥

★ ★ ★

१२५

दुनियाकिस तँतिस मँतिस बाज़ारस
डीशिथ अहारस कॅरुम गथ ।
शेतॉन्य लॅश लॉजिम पीचि बारस
मे रॉव तारस चूरस वथ ॥
नहकु ब्रम बोरुम यथ बाज़ारस
ज्यथ समसारस गॅयम लथ ॥ ॥

★ ★ ★

१२६

दुनियहस आयाय बॉजी बॉजी
सँमिथ करव बॉजी वठ ।
ब्रॉठु कनि अँछन गव मोल तु मॉजी
वुछतु किछ छय सॉनी वॉलिंज वठ ॥

★ ★ ★

१२७

दमी दियि तु मंज़ुलु वुज़े
सगु कनि दिज़्यस हटि कुय रथ ।
यार नय डेशन कॅह कॅर्यजे
यार कति त्रावि यारु सुंज़ कथ ॥

★ ★ ★

१२८

द्वद त्रॉविथ युस छोर पोन्य मंदे
सुय समसारस कंदे जाव ।
ओहर कर आव हाकस तु हंदे
अंद वन नीरिथ तपसी हाव ।।
पर तु पान युस ह्युह्य वैदे
सुय बोहु सेंदे तॅरिथ द्राव ।।।

★ ★ ★

१२९

द्वहस गुजोरुम नोफलु हथा
रातस रूदुस जागये ।
योद व्वन्य् करुहम कोबूल्यथा
नतु हून ज़न फ्यूरुस आगये ।।

★ ★ ★

१३०

द्वहय स्वन तु र्वफुय ज्यूनुम
द्वहय लूख रूदिम बंदुगिये ।
द्वहय सुवुम कपटुम तु म्यूनुम
पतव च्यूनुम पेयम शरमंदुगिये ।।

★ ★ ★

१३१

द्यारन पुरन दारन तु डबन
यीन्न मो दुनियिहुच कामन बर ।
रंज कर यि छुय नु कस्बुक सामन
बुगी सुबहन तु शामन सर ।।
खोचन छुख नो तोरुचन पामन
अत्यन गछी दामन तर ।।।

★ ★ ★

१३२

द्युतुथ नरस गोर तु तुलरस मांछी
द्युतुथ हुलम हॅलिस रौंठनस दछ ।

बुग पॉरी चानि कदरॉन्नय
द्युतुथ रूसिस कोस्तूर्य रछ ।।

★ ★ ★

१३३

निलिस पेयम नु हालव, पॅपिस प्योम नु डोट
रावि लोबुम नु रेंदिथ लबन, लोबुम नु टोट ।
काँसि पोकुस नु पतु तु कूंछ पोकुम नु ब्रोंठ
यि आम ब्रोंठ तु तथ दिचुम नु ठोंठ ।।
अंबियाहन आस पतु तु अवलियाहन गोस ब्रोंठ
शन आस पतु तु सतन गोस ब्रोंठ ।।।

★ ★ ★

१३४

नकीर तु मुनकर जवाबस वसन
परबथ चसन तिहंदि वसन सुत्प ।
शुबलिस पानस मारान तु दसन
बाँन्न तु पोथुर मा वसन सुत्प ।।
कुनिसुय जॅनिस तति आवसन
लसन पाय नतु मरस क्याँत्प ।
बुकरि प्यठु येलि कफन कासन
सरफ तु गुनसु मा वसन सुत्प ।।

★ ★ ★

१३५

नफस छुय वनुक अगि ज़ोलू
नेर्यस नु पॅट कूट मंजॉलू ।
येम्य चोट अँनिथ गजि ज़ोलू
तँमी शरअ मुहम्मद पोलू

★ ★ ★

१३६

नफसय म्याने च़ीरिवि अगो
दिचमय दगो फोलहम नु ज़ात ।

मंघन्यन मुहिथ चोलहम ठगो
हा सगो पतु चोलहम नु ज्ञात ।।

★ ★ ★

१३७

नफसी कॅरुम अदल तु वदल
नफस म्योन शेतानस बदल आव ।
नफस मानिहेम क्रयि हुंघ कदल
नफस म्योन दोज़खस बदल आव ।।

★ ★ ★

१३८

नफसी लोगुम नारो क्रोछो
दमु दमु मौंगुनम कोछ हो ।
सरुहन बुगी दीह गोम ओछो
बुगी स्वरन गोछ हो ।।
समसारस आयास पांछ दूह पोछो
गॉम यीरु गाव, तीर, वोछ हो ।।।

★ ★ ★

१३९

नफसी मोरुस तु वाय
अँचिथ रूदुम गटे ।
अथि घन यियिहम तु हाय
करतल छृनहस हटे ।।

★ ★ ★

१४०

नफसी कोडुस अँटी अँटी
नफसी कोरुस पशेमान ।
नफस छुय मदु होस हाँकल चँटी
नफस येम्यु रोट वोत ला मकान ।।

★ ★ ★

१४१

नंगर तेलान संगर मालन
छेन्हन पलन तति वालन क्या ।
सॉरी छि दपान दोज़खु ज़ालन
यिमन येति सूर गव, तिमन ज़ालन क्या ॥

★ ★ ★

१४२

नुंघन सुत्य संज़ करान रँस्यज़े
ज़न दिज़े शाह वुलगि कंज़ ।
डुठ्यन सुत्य संज़ करान चँस्यज़े
ज़ांह अँच्यज़ि नु तमुन्हन बानन मंज़ ॥

★ ★ ★

१४३

नफ्स द्युतुख ओरय मीनिथ
गछखय चीनिथ करख नु फौत ।
दम द्यू हकस लाल ज़न ज़ीनिथ
नतु छुय कुल नफ्स ज़ायकत्तुल मौत ॥

★ ★ ★

१४४

नफ्सस मो दफ बदय
नफ्सस सुती सोदा छुय ।
नफ्सुय रटुन मालि हदय
नफ्सस परज़निथ ख्वदा छुय ॥

★ ★ ★

१४५

नफ्सु चूर बुछे
द्वहय बु कोछ दिमुहाय ।
ऑखुर तूर्य गछुन गछे
यथ ज़लस हो पँछ्य आय ॥

★ ★ ★

१४६

नफ्सय मन मँचरावी
मेठि तु ज़ेठि पुछे ।
तवय उलग तु पुलग रावी
कुनि नतु कवु मालु पुछे ॥

★ ★ ★

१४७

नफसॉनियथ छय न्वकसान दीनस ।
बोवी नु तथ ज़मीनस फल ॥
नसर बाबु वगि रोज़हम कॅरीनस ।
तवु समन्द दिनय ज़मीनस तल ॥
मो माज़ मसस माज़स तु मीनस ।
तवु दिल गछी शीनस तल ॥
नसर बाबु पान पुशर जान आफरीनस ।
तवु सुत्य् चली ऑयिनस मल ॥
दूहु योद क्राव करख वदनस रिनस ।
अदु हज़रत रछी सीनस तल ॥

★ ★ ★

१४८

नफ्सय म्यानि नाटु यारो
वारु रूदहम नु ज़ात ।
जिगरस करुहय पारु पारो
गरु गरु कोरथम च़ोलहम नु ज़ात ॥

★ ★ ★

१४९

नर ब्यूछुय, नारान ब्यूछुय
ईशर ब्यूछुय ह्यथ कपाल ।
डंडक वनुक राज़ु राम ब्यूछुय
अँस्यु गॅरीब तु बोछ कया छे गाल ॥

★ ★ ★

१५०

नसर नसर सरु कर
कस यारु क्रशख दीहि सासे ।
रहि नु माल मुराद तु बॅरन्नर
यि हबा आरन्नर नकस आसे ॥

★ ★ ★

१५१

नसरु पोशख नु शेतान म्वखस
युस तसुंदिस म्वखस माज़न ।
क्रयि निशि दूर प्यवान द्वखस
लूब येम्युक क्वहा पाज़न ॥

★ ★ ★

१५२

पानय ऑसिथ पानय बोवुन
पानय ख्वश ब्य करौवन लछे ।
पानय पान कनि कनि क्रोवुन
शरहुक सौथ ब्यूठ अदु पछे ॥
दॅरियावु पतु येलि मोजा होवुन
लाल तु रत्न प्रॉविन दूछे ॥ ॥

★ ★ ★

१५३

पज़ि कथि रूदुख अँकिस दूह मो
मुखस पतु ब्रोंठ ह्युवुय गोय ।
तेलि प्योख फिकरि येलि गोख कोहनो
वुम्बुर ग्रंजाख दूह मोच्योय ॥
नुन्दिस कुन ख्वरॉय ब्रोंह मो
याम इबलीस खज़ानु ह्यथ गोय ॥ ॥

★ ★ ★

१५४

पानय छु गिंदान नफसी इसबातस ।
अँकिस सातस लब्यस नु छ्यन ॥

आरॉयिश दिच्चन अथ सिफातस ।
जातस लोबुन नु मरुन तु ज्यन ॥
शर्फ बख्शुन हजरते इनसानस ।
त्रुकुय छुख तु पानय च्यन ॥
सोरुय पानय वुछख क्या पानस ।
रातस लबि नु नैदुर तु ख्यन ॥
यिमव नु द्यान कोर अथ ग्यानस ।
अंसिस छु हिह्य राथ तु द्यन ॥

★ ★ ★

१५५

पानय पुज तु पानय कसाब
पानय पानस यिवान ग्राख ।
पानय पानस ह्यवान हिसाब
छु पानय माज तु पानय श्राख ॥

★ ★ ★

१५६

पानय छु पुज तु पानय कसाब
पानय छु पानस यिवान ग्राख ।
पानय पानस होट चटुनावान
छु पानय माज तु पानय श्राख ॥

★ ★ ★

१५७

पोज दपुन छुय नारु द्राव स्वन जन
मूरि अर्यन जन गाशुर पेये ।
अपुज दपुन छुय बूत असुन जन
यिम नु फॅल्क्य वॅव्यजि तु तिम कति बवे ॥

★ ★ ★

१५८

पोज योद बोजख पांछ नोमूरख
नतु माज नोमूरख स्वय छय नमाज ।

शिवस तु शिन्यहस म्युल योद करख
स्यद छय रेष्पु मालि स्वय नमाज़ ॥

★ ★ ★

१५९

पोशि मत्यन यिमन अब्दालन
ख्वश कॅलिमन बोज़ख माने ।
गोश रोटुख प्यठ संग्ठाठन
यिमन लालन म्वल कुस ज़ाने ॥

★ ★ ★

१६०

पांचन वक्तन सॅजदा दिज़े
म्यूठ तु मोदुर खेज़ि नु ज़ाथ ।
मातम ह्यथ दूह दूह रुज़े
दुनियिहुच लादन हेज़ि नु ज़ाथ ॥

★ ★ ★

१६१

परान परान ताल ज़्यव फोजिख
ल्यखान ल्यखान अथु तंग आय ।
तोति नु दुनियुहुच कल ब्वद ज़ॅजिख
व्वंदस लॅजिख नु फिकिर तु दाय ॥

★ ★ ★

१६२

पोज़ दपान पन ज़न नटख
अपुज़ दपान लगी रस ।
मुहम्मद त्रॉविथ इबलीस रटख
खुदॉय ह्युतुय तु खटख कस

★ ★ ★

१६३

परान परान पर गॅय
तिम खर गॅय किताबु बार ह्यथ ।

यिम दिल निश बा-खबर गॅय
तिम नर गॅय फज़्ल तु अता ह्यथ ।।

★ ★ ★

१६४

परान परान पालुन मोटुम
लेखान लेखान ज़ोलुम दिल ।
ज़िकरि सुती ख्वदाय टूटुम
फिकरि सुती रोछुम शिल ।।

★ ★ ★

१६५

परान परान पालुम मोठमो
ल्यखान ल्यखान ब्यूटुम दिल ।
ज़िकरि सुत्यन मौला टोठमो
फिकरे सुत्यन रोछमो शिल ।।

★ ★ ★

१६६

प्रेनिस बदनस मल्युन दाग गोम
जाग गोम नीरिथ बाग अँद्रय ।
हारनि गरमियि पोह तु माग गोम
फाह गोम नीरिथ हर बंदरय ।।
ज़ज़रन छ्वकु हनि हनि दाह गोम
ग्वनाह गॉम च़ेरी तु कँह्य उबरय ।
म्यूठ तु मोदुर ख्यथ उंद सियाह गोम
नाह गोम पानस राह कस करय ।।

★ ★ ★

१६७

पलना करेयम द्यव कुन वातु ।
येम्य दुनियहन कोरुम रातु म्वगुल ।।
कावव तु गांटव करिहम बातु ।
सँमिथ गबि रॉछव कोरहम गल ।।

शाह पर थॅकिम ज़ज़ुरनु ख्वतु ।
स्वनस रूदुम नु काचुन म्वल ॥
बयि छुम तमि सुमि अंद कॅह्य वातु ।
येमि तॅल्य् पकान नारुव क्वल ॥
हंगु वसि ज़ज़ुर गंग ज़न स्वति ।
सोतिथ पेयम अक्य ज़्वल ॥

★ ★ ★

१६८

फॅकीरस व्वंदस श्रोपू
सु ज़हमथ तसंज़ रहमत वैदे ।
तस कालुक न्यूल तु पगहुक पोपू
सुय गछि तॅरिथ बुहु सॅदे ॥
यिमव खुदाय तु रसूल सौरू
ती येम्य् पोल सु चाव ग्रंदे ॥ ॥

★ ★ ★

१६९

फोल हय ववख दाह फॅल्य् बोवनय
दौलथ बर तल नु यिवुन्य् ज़ात ।
खुदाय दितुय नु कूछ् ग्वनय
नीकी करनय छ्वनी क्यात ॥

★ ★ ★

१७०

फर्ज़ आव तय राथ गॅयि अदा
अति क्या ब्यूतुख रादा दिथ ।
बांग तय सलात तोरुक नादा
तति किहो आखो वादा दिथ ॥
फर्ज़ तु सुनत कर मालि अदा
निनुयो जनतस नादा दिथ ॥ ॥

★ ★ ★

१७१

बायो तेलि गछ्ख हॉरानस
येलि पानस थकी देह ।
क्या कॅर्यज़ि बलु वॅटिस शेतानस
येम्य हेत्य सारि जहानुक्य प्रेह ।।
कुनिसुय निनय अंद मॉदानस
ऑरतिस पानस पालन प्रेह ।।।

★ ★ ★

१७२

बुगि च़े ति कल गॅयी म्यॉनी
गोसय बु गॅल्य गॅल्य च़मिथ कथ ।
अदु व्वन्य बु ति कल त्रावु नु चॉनी
याम हांकल गछ्ख्यम च़मिथ कथ ।।

★ ★ ★

१७३

बुगु पॉर्य पॉर्य च़ानि क्वदरच़य
जोनुथ यस युथ द्युतुथ तस त्युथ अवकाथ ।
साहिबु पॉरी च़ानि मॉर्यफ़च़य
द्युतुथ रसूले खुदायस मोज़ाथ ।।

★ ★ ★

१७४

बु छुस अकुय, सुत्यु गोछुम यार
यारस सुत्यु दमु दमु पकु ।
यार नय डेशन गुल गछ्ख्यम खार
येति म्योन यार, तति म्योन मकु ।।

★ ★ ★

१७५

बु कुहु वनय च़ु क्या बोज़ख
बूज़ख छि वुनि नैदरि हँती ।
योरु येलि गछ्ख तोरु यिनय बोज़ख
येति नय बोज़ख, बोज़ख तँती ।।

★ ★ ★

१७६

बु पौर्य कांगरि तु जंदस
येम्य वंदस कॅरुम तुरि रॉछी ।
बहू तु बहूमत न्यामॅन्न वंदस
नून तु सँदरु काँज छुम यँड रॉछी ॥
बु क्याह मंगय कलायि कंदस
हंद तु हाख छुम छोट माँछी ।
बुगि मेहरा छुनतम वंदस
द्यव बंदस गछ्चयम शरमि रॉछी ॥

★ ★ ★

१७७

बु मय माज़य आदर तु शूरे
बु दॅय खोतुस कोस्तूरस ।
बु क्या मंगय गोबुरस तु कोरे
बु पौर्य लोरि तु बोस्तूरस ॥

★ ★ ★

१७८

बु योद ज़ानुहा दुनिया छु ब्रमा
नमुहा तु ह्यमुहय लागुन जॉनी ।
कोरथम छल तु छुनथम गमा
पथ कूँछ लोबुम नु सथ छम चॉनी ॥
छुख सौर पानय पान छु दमा
नाहक हांछ कॅरुथ मॅरिस म्यॉनी ॥ ॥

★ ★ ★

१७९

बुगु कंदि छावुहम हर्यन
वुछख नु गनु तुलर्यन माँछी ।
बोम्बरा तु रोज़ि नु थर्यन

नाहकु छन्यन लर्यन करव रॉछी ।।

★ ★ ★

१८०

बंगि कॉनिस अंबर छ्वटे
वीरि कॉनिस फल नो बोये ।
ग्वरु कॉनिस अंबर म्वटे
वतु कॉनिस अंदोह पेये ।।

★ ★ ★

१८१

ब्यगुर ल्योल तु छापुर पॅजी
बंदु अथि खेजा लॅजीयो ।
डाय गज़ अरज़ुथ ज़मीनु दुजी
यि दुनियिहुच लोलॅर ञॅजीयो ।।

★ ★ ★

१८२

ब्रॉठ येलि छुनन पापुन्य् बॅही
तति कथ पोशु वदनस तु रिनस ।
कॅरिथ ग्वनाह वैदिथ मही
कॅह्य वसु तहि ज़मीनस ।।

★ ★ ★

१८३

मॉज ग्वफि छुम कोडमुत गछ तय
मॉज सुह तय शाल छिम बॉच्युय ।
मॉज वमुर व्यंदन अख पछ तय
मॉज द्यव यछ छिम खॅज़मॉच्युय ।।

★ ★ ★

१८४

मॉज बु ति नय गरु चोन यिमय
मे बिन्य् ख्वदॉय थोव यी लोनो ।
मॉज थाजि नय बतु चोन ख्यमय

मे बिन्य् अन तवु साफ सपनो ।।

★ ★ ★

१८५

मीश खश ना करनस पज़ी
ज़ान तु वुछ सुय कपटान ।
योद म्योन ग्वरु पद सज़ी
अकुय जुव बडि बुह गिंदान ।।

★ ★ ★

१८६

मुकाम रूज़िथ मन नु मोरुम
यि कॅम्य् हूंच्य् फुटोरुम शीश ।
गुपन वूरे व्वदुर बोरुम
कस नु कोरुम वलुवीश ।।
यि दिह शीरु नाबदु संदोरुम
अदु सखोरुम परदीश ।।।

★ ★ ★

१८७

मुडो कंघो अन्नख चिलस
कथु कर पनुनिस दिलस सुत्प ।
युथनो शेतान फरी शिलस
अदु तुलनय अबू जहालस सुत्प ।।

★ ★ ★

१८८

मुडस प्रनुन छुय हँस्य्तिस कशुन
दांदस निश यस बिहे च्चाव ।
मुडो मुरखो मरुन कवु मशुन
म्यँत्रस स्वकार छि तारन नाव ।।
क्यथु नु साहिबस मँगिव अरशुन
छु सौंतु फलस वरशुन वाव ।।।

★ ★ ★

१८९

मो कांछ शुर्य मुर्य तु गबर
मो बर गुमान छुस दुनियादार ।
काँल्य होश थकी त्रोपुनय ज़ु बर
अदु शुर्य मुर्य तु गबर गंडनय लार ॥

★ ★ ★

१९०

मनस खय कास ज़न ऑयीनस
तवु ज़नस गछी ज़ॉनी ज़ान ।
थलि थलि क्या छुय शुर्य म्वखु पानस
मरनस ब्रॉठ मर सुय छुय ग्यान ॥

★ ★ ★

१९१

मलु छिवु तोह्य तु मंजु कम दूसु
छलस छिवु ज़ागान अँकिस अख ।
अँलिम छिवु परान माशि कि हावसु
मे हमसन डीशिथ यिवान च़ख ॥
येति छुवु गुमानु अँस्य् छि खासु
तति नो म्वकलिव सासु मंजु अख ॥ ॥

★ ★ ★

१९२

मल्ला ड्यूतुम माशी ख्यवान
हाकस दपान यि छुवु कछ ।
डाकर छुनान बाकर ख्यवान
मँशीदि दपान ज़ि अति छुवु यछ ॥

★ ★ ★

१९३

मलय अँस्य्जि तु मोलाये रोमी
नतु वँर्यजि रुमु रुमु इस्तिगफार ।
सोदरस तार दितुय तँमी

पानय सपुन पानस यार ॥

★ ★ ★

१९४

मर्ग छुय सुह तु कोतू बॅलिजे
खेलि मंजु कडी चौरिथ कठ ।
मर्गच शर्बथ चनु रोस नु बॅलिजे
सुलि क्यथु नु गॅयास मॅरिथ कथ ॥

★ ★ ★

१९५

मुहम्मद तु चोर यार बर हक गँजरख
तिमन निश अंदि दीनुक न्याय ।
जान पान पनुन तिमन पथ बँजरख
स्वय छय तोर किच बॅड रहकाय ॥
अँनिस अथुवाल पाय क्यथ स्यजरख
यामथ नु वरजरख पीरु संज जाय ॥

★ ★ ★

१९६

माजुय छुम तु माज क्यथु ख्यम
ख्यम हा गाडु छिख अँड्यजि तु पखुच ।
व्वन्य् छम नेथा यूतुय ख्यम
अख म्यँट मीनिथ साहिबु बखुच ॥

★ ★ ★

१९७

माशोकन येलि दर्शुन होवुन
दर्शुन द्योवुन मनसूरसय ।
शोकुक शराब सु येलि चोवुन
कत्ल क्रोवनस ज़न चूरसय ॥
क्वंगु तु कोस्तूर तति येलि नोवुन
मन मनोवुन तँम्य् दारसय ।
आशकन ऑरिफन वथा हॉवुन

कथा थॉवुन समसारुसय ।।

★ ★ ★

१९८

मंगुहा तु छु मंगनस आरा
छे मंगनस तु मरनस अकय बिथ ।
हातम ताई जगु दिव दाता
छुख पानय दाता बेयन हुंद हिथ ।।

★ ★ ★

१९९

यख तुलकतुर शिशर गाँटु शीन
तिम ब्योन ब्योन पाँदु कॅर्य आशीन ।
यामथ खोतुख पूरि किन्त्य रव
तामथ तिमन च्वन अकुय गव ।।

★ ★ ★

२००

यार हय आसि तु सर तस दिजे
यार छुय विजि विजे प्रबात ।
बुतलिस चॅम्यजि तु अदु कति यिजे
वक्तु रखचस कॅर्यजे क्यात ।।

★ ★ ★

२०१

यावनु पचास रंगन तु संगन
हंगन बबर लॉगिथ कथ ।
ऑसिम ख्वरन कूंश तु पाँजमु जंगन
अंगन जामु पुरिथ कथ ।।
मोत हापुत खोतुम टंगन
वोथुम ज़न लंगन गरि सूर कॅरिथ कथ ।।।

★ ★ ★

२०२

यावनु हंग गॉरिथ पर गरस

यामथ खरस रॉवी कन ।
यामथ क्रशख परस
तवु गॅरिथ गछी खारस कन ॥

★ ★ ★

२०३

यावनु म्याने गुलि अनारो
छी रंबुल्य् गुल्य् तु शूबजि मछय ।
यिम येलि ज़ालनय दोज़खुनि नारो
अदु क्या करु तु अदु कोर गछय ॥

★ ★ ★

२०४

यावुन म्योन सु ति कोर सनु गोम
ब्वन वालुन कान तु नाँविथ कथ ।
थॅकिम कोठ्य तु कारवान ब्रौह गोम
संगुर्य दूह गोम वॉलिथ कथ ॥
वनुन काँसि हुंद व्योपुम नु पनुन राह गोम
सियाह गोम कलम लीखिथ कथ ।
ज़ानि कस वॅनिथ यीरुवुन तोह गोम
दुनियिहुक मुह गोम चॅलिथ कथ ॥

★ ★ ★

२०५

यि हय माँज कूर्य योद व्वन्य् तगी
अथि द्यन लगी नकस रॅछ्यज़ि च्यथ ।
यि हय माँज त्वर्ग रॅट्यज़्यन वगी
ऑस्यज़ि मरग पनुन च्यतस ह्यथ ॥

★ ★ ★

२०६

यिम कस मॅरिथ मारन
तिम च़ालन तु लागन दास ।
यिम सहज़ु खुदाय गारन

तिम सौरुय व्यंदन सास ।।

★ ★ ★

२०७

यिमन क्या करख द्यारन
यिम हो रोज़न येती ।
नमाज़ि पुछि हो मारन
पाफ़ ज़ीनिथ कुती ।।
नज़रा करतो अंद मज़ारन
सॉरी जि च़मव तँती ।।।

★ ★ ★

२०८

यिम उंदु श्वद दर्शनु गॅली
तिम नेबरु ज़ॅरी तु वॅल्क्य् छी ।
यिम द्राय तवु नारु शिहली
तिम अदु लाल म्वलुली छी ।।

★ ★ ★

२०९

यिमय लूब मनमथ मारन
तिमय च़ालन तु लागन दास ।
सहज़ु यिम सॉहिबस गारन तु
तिमय सौरुय व्यंदन सास ।।

★ ★ ★

२१०

यिरवुन वछ़ास चिरवुनि नावे
आवलुन वलिमु किनु लगय बटे ।
नाबद छुन्याम सँदरुकाँज़ पावे
मेठ्या काँज़ किनु नाबद टेठे ।।

★ ★ ★

२११

यु साद व्वपल हाकस तु हंदे

स्वज़न सहज़स ग्रंदे ज़ाव ।
द्वद त्रॉविथ पोन्व् युस मंदे
सु समसारस कंदे ज़ाव ।।
पर तु पान युस ह्युवुय वेंदे
सु बवु सेंदे तॅरिथ गोव ।।।

★ ★ ★

२१२

युन गॅरा गछुन गॅरा
कांगरा गॅछुम तपुन्व् किच्युय
लॅदिथ छुनिथ व्वगुन्व् लॅरा
च्युय मरख तु यि कस किच्युय
अॅछन वुनर कनन ज़रा
नाहकृ पांछ द्वह बॅरिम फेच्युय
हचिवि लरि गोम द्वदुर कॅरा
आसमानस लॅज़ुम मेच्युय
अपारि बठि छुम अरुसरा
अपारि पशन आस्यम यॅच्युय
दिमुहा वुफ, लोबुम नु परा
परु रोस्तुय नॅर म्यॉन्व् मोच्युय
छुनुहा थाह तु बोड गोम व्वलरा
ख्वर नु वॉयिम थॅकिम हॅच्ची
अॅछ कन त्रोपरिथ त्रॉवुम लरा
जाय शीरुम नॅदरि किच्युय
हकृ कुन वातु नु लोबुम नु तरा
??????

सथ गोम सार तु कोरनम वरा
पोश ज़न कोरनस नफ्सुनि वृच्युय

★ ★ ★

२१३

युन नो गोछुय अने गटे

व्वदुर क्वलि मंज़ फटि नु ज़ांह ।
हूनिस अँडिज रोटि नु हटे
वँमीनस खँदमथ व्वथि नु ज़ांह ॥

★ ★ ★

२१४

युस ओस मेच्चि तल आव सू
स्व म्वखु ओस प्यठ बवुसर ।
येति बूज्य् बूज्य् आसि नु असू
यस नु आसि रोज़ान डर ॥
दुनियाह छु लज़ गेलुन तु हासू
ओसुख नु ओस सुलतान सिकंदर ॥॥

★ ★ ★

२१५

येति ति मे च्य, तति ति मे च्य
मे च्चे छारान लूस्तुम द्वह ।
ग्यानस मंज़ येलि रोदुख मे च्य
मे च्चे तु पानस दितम छोह ॥

★ ★ ★

२१६

येति ति मे च्य, तति ति मे च्य
मेच्चे करतम गुलज़ार ।
सोरुय त्रॉविथ रोदुख मे च्य
मे च्य हावतम दीदार ॥

★ ★ ★

२१७

येम्य् लूब मनमथ मदचूर मोरुन
वतु नॉश मॉरिथ तु लोगुन दास ।
तँम्य् सहज़ु ईश्वर गोरुन
तँम्य् सोरुय व्यौदुन सास ॥

★ ★ ★

२१८

येम्य ह्योत तिहंदि बरतल ज़ागुन
तस पनुन्य शरबथ पानु चावे ।
छिस पॉथुर ब्योन ब्योन अकुय छु मागुन
सु यस टोठि तु सुय अदु प्रावे ।।

★ ★ ★

२१९

युस ओस येति सुय छुय तते
सुय छुय प्रथ शायि रँटिथ मकान ।
सुय छुय प्यादु तु सुय छुय रथे
सुय छुय सोरुय गुपिथ पान ।।

★ ★ ★

२२०

येम्य थवि सथ ज़मीनु नव आसमान गंगु
तस बु मंगु सुय मे दिये ।
सु येलि रोश्यम हंग तु मंगु
अदु कस बु मंगु, कुस मे दिये ।।

★ ★ ★

२२१

येतीम गँछिथ गछान छु हॉरान
येतीम मोत ज़न फेरान आसे ।
येतीमस मोल मॉज यी सोरान
येतीम वदल मु गँछिन काँसे ।।

★ ★ ★

२२२

यथ क्या करव रूदस तु रबे
आसु तु पुलहोर लोब मो ।
त्रावान छि ख्वर गछान छि रबे
जुवस ति करार लोब मो ।।
डोख च़लि नीरिथ यथ ज़ॉल्यु डबे

दुबारु दुनिया लोब मो ।।।

★ ★ ★

२२३

यथ दुनियहस मांछ टॉकिस माज़ ऑविथ
बुगी कंदि ब्राँविथ मथु ।
म्यूठ ख्यॉविथ, ज्यूठ कंदॉविथ
याम सु यार क्रॉविथ अथु ।।
पतव निन तु मज़ार सॉविथ
यि ख्यॉविथ चॉविथ तु दॉविथ अथु ।।।

★ ★ ★

२२४

यस कान कांछ नतु छोन आसि नालू
सु कॅह्य सिपाह जंगस अत्रे ।
येम्य नु लूब तु तमाह गोलू
तमि स्वकालु तस कुस पत्रे ।।
येति आसु क्रय करनुक आलू
स्वय शय रटनस क्रय कथ वेत्रे ।।।

★ ★ ★

२२५

रज़ि तु गज़य बुतलि म्यूनुम
अपुज़ करान च्यूनुम मो ।
पतव सरु मंज़ु हुब ज़न छेनिम
ज्यथ दुनियाहस कॅह ज्यूनुम मो ।।

★ ★ ★

२२६

रातस दूहस वॅलिमा पोरुम
ती ज़न मोरुम तिलुक्य् स्वन ।
राथ तु दूह कनि प्यठ बोरुम
ओसुस सास तु सपनुस स्वन ।।

★ ★ ★

२२७

रिज़िक छुय ब्रोंठ तु मोत छुय पतु
दुनिया छु शहरुक अतयगथ ।
स्वरुन बुगी तु गारुस वतु
बोज़खय छय रोज़ान नेक बद कथ ॥

★ ★ ★

२२८

रूद म्यूठ फलस तु जटस
मुठ म्यूठ छिरु कटस आसे ।
रस म्यूठ बुडस सस म्यूठ बटस
नैदुर मीठ ट्रॉलिद कटस आसे ॥

★ ★ ★

२२९

रूदुम नख ज़ु वॅटिथ फेक्क्य ज़ु व्हॉरिथ
व्वदुर ह्योकुमस नु बॅरिथ कथ ।
च़जास दूर तु औनुनस गॉरिथ
कूंछ नु रूदुम पॉरिथ कथ ॥
वाल्लाह छुनमस पला तुलिथ
बिल्लाह तनु छुस शिहलिथ कथ ॥ ॥

★ ★ ★

२३०

रेष्य् ऑस्य् पॅतिम रेषी
तिमन प्यठ जंदु बंगि पन ।
मँगिथ खारहन वुशकय कोशी
तप चरहन पथ वनन ॥
अँज़िक्क्य रेषी केलक रेषी
यिमन माज़ ख्यनस कम ।
खॉस्य् ज़ु थवन निशम निशी
अँकिस ग्वगल बेयिस क्रम ॥
न ख्वथ येलि खुदाय मशी

रेशी हय तोह्य तु चूर कम ॥

★ ★ ★

२३१

रेष्य हय रेष्यत पालहन
संग गालहन क्रयि हुंदि अशि सुत्य ।
रेष्य छिनु रेष्यत पालन
पान छि गालान रुशि सुत्य ॥

★ ★ ★

२३२

रोज़ु तु नमाज़ु तय कर
यि दैय कर दमस वोनू ।
योद जन्नत गछी क्रय कर
छे मेहनथ तोत किच्च थवनू ॥
नुन्दन सुत्य ख्वय कर
व्वथ बन्दु रोय कर तु वॅकबिलस कुनू

★ ★ ★

२३३

लूबस तु मुहस द्युतुथ रज़ा
कूलस प्यठ त्रे वुदु तय हाय ।
पांछ वक नमाज़ वॅरिथ कज़ा
तवुक सज़ा दियी ख्वदाय ॥

★ ★ ★

२३४

लूबस तु मुहस मद अहंकारस
क्वंगन डारस वयम नु पोन्य ।
द्यार सूरिम सोदागारस
छोन बाज़ारस वॅह्य बिहि वोन्य ॥
ऑखुर च्रमव सॉरी मज़ारस
नारस व्वन्य कति सारस पोन्य ॥ ॥

★ ★ ★

२३५

लगि नु कनि पल कुबस
लगि नु आहनस नार ।
लगि नु मोकुर दरगहस
लगि नु शहस इनकार ॥

★ ★ ★

२३६

लालुच कद्र डूंगल ज़ाने
पोश क्या ज़ाने सोथ्य पेठ्य वथ ।
शमुहुच कद्र लॅश क्या ज़ाने
मॅछ क्या ज़ाने पोंपुर्य गथ ॥

★ ★ ★

२३७

ला इल्लाह इलल्लाह सॅही कोरुम
वॅही कोरुम पनुन पान ।
वोजूद त्रॉविथ मूजूद म्यूलुम
हरम्वखु वुछुम पनुन पान ॥

★ ★ ★

२३८

लिन्य ज़ंडस युस दानु मंगे
कछस मंगे ज़ाफल तु र्वंग ।
आंगे मांगे दपान लंगे
हतु होनि ख्यतु ज़ंग ॥

★ ★ ★

२३९

लवर किथु वुठक सेके
आबु वानि रुखे पकी नु नाव ।
ति कुस काँसिथ हमालि हैके
यि लॉन्य डेके ल्यखनु आव ॥

★ ★ ★

२४०

वदनु वदनु अँछन गाश सोरे
बुडनु श्रुक, नेरि नु ज़ात ।
येति छे च्वपॉर्य वतु नतु छु हेरे
वदनु वदनु तस फेरि नु ज़ात ।।
दिल साफ करतन लबुहन ज़ेरे
नतु शालु सुंदि वुंगनु नेरी क्यात ।।।

★ ★ ★

२४१

वनन पँजी तु वांदर आसन
गगर ग्वफन बरन वास ।
यिम पांचन वक्तन अकमल आसन
निशि बाँचन आसन तिमय छि खास ।।

★ ★ ★

२४२

वय दयि मेत्रु ब्योलुय वँव्य़े
सगु कनि दिज़्यस हटि कुय रथ ।
यार नय डेशिहन क्या वँर्य़े
यार कति त्रावे यारु सुंज़ कथ ।।

★ ★ ★

२४३

व्वंदु नय गँडिज़ि तु काँम कति नेरे
वेह नय खेज़ि स्नेह कति फेरे ।
योरु नय गँछ्यज़ि तु तोरु कोत यिज़े
लोब नय आसि तु वोन कति यिये ।।

★ ★ ★

२४४

व्वपल हाकस तर गोम दँज़िथ
सिवलि कनि ति ख्याव बँज़िथ कथ ।
जंगुल्य सुह्य ज़न वोननुम ग्रँज़िथ

फीरिथ ति ह्योकमस नु अग्रिथ कथ ॥
ओडुय हरफा गछिहेम सँजिथ
दँज्य दँज्य द्रमुन ज़न कछ दँजिथ कथ ॥॥

★ ★ ★

२४५

वोद इबलीसन ट्वख लोगुम दूरस
स्यठाह करेमस इबादथ ।
कँम्य पोव दूर्यर मे तु मनसूरस
तस तय मे ऑस कुनी कथ ॥
तस च़ोल नीरिथ अन मनसूरस
शाबाश करनस छय रहमथ ।
मे छुम द्यावान छ्यपु ज़न च़ूरस
मरदूदु म्यान्यो छय रहमथ ॥
बु ओसुस वॉकुफ तिहंदिस सीरस
मे ऑस मोलूम हँकीकथ ।
तँम्य येलि लोदनस, बु क्यथो लूरस
अथ मानि ज़ानन अहले मुऑरिफथ ॥

★ ★ ★

२४६

वोनुन तु वनु निशि लंजे च़चन
कँह्य च़ँटिथ लबख हचन फल ।
कंघो माज़ुन डबन तु दँरिचन
द्यन क्यथु बरख ज़चन तल ॥
शेतॉन्य हारु वँत्र रचन
कॉल्य हिसाब ह्यनख बछन तल ॥॥

★ ★ ★

२४७

शिव छुय थलि थलि रोज़ान
मो ज़ान ह्यौद तु मुसलमान ।
त्रुकय छुख तु पान प्रज़नाव

स्वय छय साहिबस जॉनी ज्ञान ।।

★ ★ ★

२४८

शिव छुय जॉव्युल जाल वहाँरिथ
ती छुय मरुन तिरथ कथ ।
जिंदु नय मरख अदु कवु जि मुरिथ
पानु मंजु पान कड व्यन्नोरिथ कथ ।।

★ ★ ★

२४९

शिव मो दीवु म्वखय आसे
फल मो आसे अरखल्यन ।
सन्यन सोदरन ज्यव मो आसे
ग्यव मो आसे वांदरन ।।

★ ★ ★

२५०

शिव शिव करान शिव मो बोजे
ग्यव कंदि करख मनुनि बुजे ।
ग्यव द्यू दिहस दिह दौर रोजे
दिखनय दिहस बेयिस दिजे ।।

★ ★ ★

२५१

शुर्य पानु जन ओसुस गूर गुपनन पतु
सूर यावुन कस कत्युक आव अतयगथ ।
सूर यावुन लोरनम हंग हागर तु
सूर यावुन युन गछी जन अतयगथ ।।

★ ★ ★

२५२

शे वन चितनिथ शशकल वुज्यम
प्रकथ हुजुम पवनु सुत्यु ।
अँशकुनि नारु वालिंज बुजुम

छुम अँशक माशोक ह्यमन सुत्य् ।।

★ ★ ★

२५३

शे वन चँटिथ शेशि कल वुजुम
प्रक्रथ होंजुम पवनु सुत्य् ।
लोलुकि नारु वॉलिंज बुजुम
शंकर लोबुम तमी सुत्य् ।।

★ ★ ★

२५४

शदाद तु फिरोअून लॉगिथ रूदी
अपुज द्युतुख दरवेश नाव ।
यिम सोरुय त्रॉविथ तस पथ मूदी
तिम छी दारदुक स्वन नारु द्राव ।।

★ ★ ★

२५५

शिलस ब्वय छय कोस्तूर तु बबरे
दिलु योद गारख कांछी साम ।
वुछुन इबलीस छ्वख दिस तबरे
गछी नीरिथ म्वखु शुत नाम ।।
दोर योद रोज़ख फरज़स तु खबरे
अदु हिसाब आसी नु कयामुन्न ताम ।।।

★ ★ ★

२५६

श्रावन सूर तु कोस्तूर कल्यव
रंगु बुलबुलस गँयम गलि ज़्यव ।
यावुन सूर कुनि सुत्य् नु बल्यव
अदु वयस नु कंद नाबद तु ग्यव ।।

★ ★ ★

२५७

साह्यब ड्युंतुम क़ालु गरे

स्यख तु म्येन्न मिलुनॉविथ कथ ।
पानु करान अँकिस गरे
लोरि सुत्पु गिलुनॉविथ कथ ॥
दुकान द्युतुन क्वालु गरे
बानु कुनन म्वलुनॉविथ कथ ॥ ॥

★ ★ ★

२५८

सॉन्पु शुर्य छि नन्यन वुरान
यँडनुय छि रटान च्वाख पन ।
तुहुंघ शुर्य छि सुतन मुहान
गँछिथ तु दवान नारसन ॥

★ ★ ★

२५९

सिरस कॅर्यजि नु वाश वाशे ।
नतु कडनय पाशे नाव ॥
गरीबस गछान दूह नाशे ।
पॅपिथ थवान छिस राशे नाव ॥
जागनस तु लगनस वालय वाशे ।
कृत्यन तिहँदि सुत्पु गाशे आव ॥
छु कॅलिमुक ताज तु अँलिमुक आशे ।
सु कस लागि अदु आशे नाव ॥
येम्यु कोर तस पथ दूह नाशे ।
तँम्यु तस लोगुय आशे नाव ॥

★ ★ ★

२६०

सु मे निशे, बु तस निशे
मे तस निशे करार आव ।
नाहकय छोंडुम मे परदीशे
पनुने दीशे मे यार आव ॥

★ ★ ★

२६१

सुबहुकि वक्तु फरिश्तु वसन
गेशन क्वसु छवु आसन शय ।
जल यिम चावन तु मल यिम कासन
तिमन येति खोतु तँत्य् आसन शय ।।

★ ★ ★

२६२

सुबह वक्तन फरिश्तु वसन
आदम दमन रँछतव शय ।
जल यिम छावन मल यिम कासन
तिमन येति ख्वतु तँत्य् योत आसन शय ।।

★ ★ ★

२६३

सुय च्चालि न्यंदु येम्य् वोव ब्योलू
छाँडिथ कड्यस हामु काँन्य् ।
साँतु येम्य् वोव हरदु तँम्य् तोलू
सुय च्चाव जनतस लाँगिथ वाँन्य् ।।

★ ★ ★

२६४

सुह आँस्य्जि तु शाल ज़न पँक्य्जे
शरहुक सोथ च्चँटिजि नु ज़ाथ ।
छाँठ नय ज़ाँन्य्जि बठि तलु पँट्य्जे
व्यदस ति रोजि खँट्य्जि नु ज़ाथ ।।

★ ★ ★

२६५

सु छुम नु जि सोदा करु
बाज़र लोबुम नु कुनन ।
वाँजि कोरनम ज़ाँल्य् पंजरु
खंजर दिथ गोम मारनन ।।
ब्यब बँरनम बुसरि नारु

कस नु पोशुम वनुन ।
हन हन गॅजिम सुसरि नारु
दिलस कोरनम पर्युन ॥

★ ★ ★

२६६

सुह ऑसिथ शाल ज़न नॅट्यज़े
गरीब नय लॉग्यज़ि तु वॅन्यज़ि नु ज़ांह ।
चॉनिथ नय नखु पॅट तल फॅट्यज़े
शरहुक सोथ मालि चॅट्यज़ि नु ज़ांह ॥

★ ★ ★

२६७

सेकि शाठस फल वशख
वुशख च़मरुव्यन थाजन तील ।
मोदुर सोत वारु ब्रशख
छुनुथ ज़न कोम याजन तील ॥

★ ★ ★

२६८

संज़ुय छुम मोल तु संज़ुय मॉजी
तवय रूदुस संज़ुय हाव ।
ड्यकु लीखिथ करमु फ्योर पेयाम शोदुय
तते बु नुंद तु येति द्राम नाव ॥

★ ★ ★

२६९

सखावत करख तवु दिनय ख्यनय
नमाज़ि हुंद छुय पनुनुय न्याय ।
तति येलि हनु हनु हिसाब ह्यनय
अदु कथ लगनय फिकिर तु दाय ॥

★ ★ ★

२७०

सब्र योद करख सुय बोवि चोनू

यि लानि आसी ति अथि यियी ।
चु योद करख म्योन तु म्योनू
अदु द्युतुमुत अथु च्चे हेयी ।

★ ★ ★

२७१

सुबह वक्तन फरिश्तु वसन
आदमन दपन रँछतव शय ।
ज़ल यिम छावन मल यिम कासन
तिमन येति खोतु तँत्य् योत आसन शय ।।

★ ★ ★

२७२

सर्फस चँल्य्जे अस्तस खंडस
सुहस चँल्य्जे कुहस ताम ।
दीनदारस चँल्य्जे वहरस खंडस
लॉनिस चँल्य्जि नु अछमुहस ताम ।।

★ ★ ★

२७३

स्यद यिम च्यथ थवन पर-व्वपकारस
नारस सलर दूहय छृनन तु ।
सिव यिम करन जगन रोज़गारस
तिम समसारस ज्यन तु ।।

★ ★ ★

२७४

स्वंदरि कामु दिवुन चाव गोम
यावुन याम गोम पोशन मोतू ।
संगरुक शीन तु व्वलरुक वाव गोम
मुहिथ ठग गोम अकु होतू ।।
वुलगि बतस कनु तु तोह गोम
गरीबस दूह गोम वँरियस योतू ।।।

★ ★ ★

२७५

स्वनस तु सरतलि अकुय ज़लुन
ति डीशिथ जुव म्योन कलुन ह्योत ।
ड्यूंतुम नुंघन ल्युथ तु डुठ्यन फवलुन
तवय अंदवन मे च़लुन ह्योत ॥

★ ★ ★

२७६

स्राना कॅर्यज़ि युथ नु कूँछ डेशी
द्याना कॅर्यज़ि गुपिथ पान ।
क्रिया कॅर्यज़ि युथ नु ज़ांह मशी
मशी तु नशी पननुय पान ॥

★ ★ ★

२७७

समि नु बोड गुर तु टोटू
समि नु टटुल तु नाव ।
समि नु क्वल तु र्वपु वोटू
समि नु राज़ होंज़स लरि काव ॥

★ ★ ★

२७८

सहज़ ग्यान यव सुत्य् उलंगी
लोलुकि खम्बय रंगी ज़ाथ ।
असि मन मिलॉविथ तन साद डंगी
यछे पछे मंगी बाथ ॥
दुय योद च़ल्यस कास्यस बॅगी
तस कुस अदु रंगी ज़ाथ ॥ ॥

★ ★ ★

२७९

साह्यब दूहु अकि दोरा फिरे
यथ समसारस करि लुर पार ।
द्वन आसमानन ब्यन मा दरे

सतन तुलि येति दफतरवार ।।
गौरस तु जेरिस हॉज़िरे
दियि नुंघन जनथ तु डुठचन नार ।।।

★ ★ ★

२८०

संगर लूस्तिस कांगुर छेवुम
गजन प्योवुम लदस क्योत्त्य ।
फल डेर त्रॉविथ मल डेर व्योवुम
कल ब्वद खेयिनम द्यन क्या रॉत्त्य ।।
स्वन र्वफ त्रॉविथ सरतलि र्योवुम
करतल फुटरिथ गॅर्यमस द्रॉत्त्य ।
सौंतु यि वोवुम, हरदु ती लूनुम
लूनिथ लोगुम पानस सॉत्त्य ।
द्वह लोग दरु तु दांबरि प्योवुम
ओगुन छ्योवुम बानु नु वॉत्त्य ।।

★ ★ ★

२८१

सु गुल क्या मंगि गुलस तु गुलिस्तानस
यस टॉठिस जानस छांगुर गॅय ।
सु क्या मंगि आफताबु किस नूरानस
यस अंद मॉदानस नैदुर पेय ।।

★ ★ ★

२८२

स्रोगुय ओनुम द्रोगुय कुनुम
नुनु बार लोयुम सरु ।
मोदरि ज़बॉन्त्य बेयन प्रनुम
पानस वुनुम तु राह कस करु ।।

★ ★ ★

२८३

हा हय हांग नार ज़न वुज़न
गुंबद वज़न दुन्य् दुन्य् कथ ।
स्वज़न इशारतय बोज़न
क्वज़न बोज़न नु दमामु गथ ॥

★ ★ ★

२८४

हे बटो, वेत्रे बटो
पतु ब्रौठ छय वाटुवाठ ।
सिव कस करान छुख वेत्रे बटो
मनस तु पवनस कर संग्गाठ ॥

★ ★ ★

२८५

हूनिस वासरि प्यठ सूर लारे
ब्रौरिस गजि अंदर स्वख ।
र्योशा वनन खुदाय गारे
रेंचि छु द्वखुय स्वख ॥

★ ★ ★

२८६

हुहय तुरि तु हुहय तते
हंजे कर्यस ल्वय तय ग्वय ।
आशक छि निसार तिहिंजि वते
येति बोम्बरस तु पोशस आसी ख्वय ॥
ती यस व्यद सनि सुय अदु मते
तस अदु गछी द्वयि अकोय ॥ ॥

★ ★ ★

२८७

हे बंदु मोत छुख लूबस तु मुहस
सुत छुख लॉगिथ वॉनी ।
नफस छुय फिरवान द्वहस
पॅट छय गँडमुच्र लॉनी ॥

थपु छुय द्यावान ग्वहस
अक्लि हुंज लॅबुय नु दौनी ।
फख छुय यिवान कुहस
मसु छय बॅरिथ मॉनी ॥
हून छुय गोमुत खुहस
पाक क्यथु सपदि पॉनी ।
गुमुत छुख मिलवान फुहस
ख्यनस पजी नु दौनी ॥
ब्रोर छुख अथि व्वन्य सुहस
कथा बोज़तो म्यॉनी ॥

★ ★ ★

२८८

हेतिस ह्यतु कार वॅर्यजे
अन-हेतिस रॉवर्यजि र्यथ पछ ।
युस युथ करी तस त्युथ वॅर्यजे
आन लयि नु पांछ तु लयि लछ ॥

★ ★ ★ ★ ★ ★ ★

शुख

शेख-उल-आलम (नुन्द ऋषि)

★ ★

Source: Kuliyate Sheikhu-ul-Alam, compiled by Moti Lal Saqi, a Publications of J&K Academy of Art, Culture and Languages.

**Compiled and re-written in
Standardised Devanagari-Kashmiri by M.K.Raina.**

★ ★